

10.07.2026

UKA2026/278

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuisut Kalaallit Nunaanni nuna nunaminertallu privatimik pigineqalersinnaannginnerannik, tunineqarsinnaannginnerannik, qularnaveeqqusiuinneqarsinnaannginnerannik iluanaarniutigineqarsinnaannginnerannillu kiisalu nunaminertat taamaallaat atuisinnaatitaanermut malittarisassat naapertorlugit atugassiissutigineqarsinnaanerannik atorneqarsinnaanerannillu aalajangersaasumik Inatsisartut inatsisissaattut siunnersuummik saqqummiussinissamut peqquneqarnissat pillugu Inatsisartut aalajangiiffigisassaattut siunnersuut.
(Inatsisartunut ilaasortaq Pele Broberg, Naleraq)

Tunngavilersuut:

Siunnersuummi tunngavik pingaarutilik inatsisitigut aalajangersarniarneqarpoq: Nunarput tuniniagaanngilaq.

Kalaallit Nunaanni ullumikkut tunngaviuvoq nuna pigineqarsinnaanngitsoq, nunaminertamilli atuisinnaatitaasoqarsinnaalluni. Tunngavik tamanna inatsimmi erseqqissumik aalajangersarneqartariaqarpoq, siunissami nuna nunaminertallu namminersortumik pigineqarsinnaanersut, tunineqarsinnaanersut imaluunniit qularnaveeqqusiuinneqarsinnaanersut pillugit nalornisoqarsinnaajunnaaqqullugu.

Kalaallit Nunaanni nuna inunnut ataasiakkaanut, ingerlatseqatigiiffinnut, aningaasaliisartunut imaluunniit nunanit allanit soqutiginnittunut tunineqarsinnaassanngilaq. Nalinginnaasumik nioqqutissatut niuerutigineqarsinnaassanngilaq iluanaarniutigineqarsinnaassanani.

Nunarput inuiaqatigiittut inuunitsinnut, kulturitsinnut, piniarnitsinnut, aalisarnitsinnut, ilaqutariittut inuunitsinnut, nunaqarfitsinnut, illoqarfitsinnut siunissamilu namminiilivinnissatsinnut tunngaviuvoq. Nuna namminersortumik pigineqarsinnaalissappat, siunissami iluanaarniutigineqarsinnaalissaaq nunaminertallu aningaasarsiornikkut nukittuunut ikittuinnarnut katersuussinnaallutik.

Nunaminertat inissianut, inuussutissarsiornermut, pisortat siunertaannut inuiaqatigiinnilu pisariaqartumik ineriartortitsinermut sulii atugassiissutigineqarsinnaassapput. Siunnersuummi sanaartornissaaq inuussutissarsiornermilluunniit ingerlatsinissaaq inerteqqutigineqanngilaq. Taamaallaat nunaminertamut pisinnaatitaaffik atuisinnaatitaanermut tunngasuusariaqartoq, namminersortumik piginnittuunermut tunngasuunani, aalajangersarniarneqarpoq.

Namminersorneq pillugu inatsimmi tunngavigineqarpoq Inuiaat Kalaallit nunat tamalaat inatsisaat naapertorlugit inuiattut nammineerlutik aalajangiisinnaatitaasut. Pisinnaatitaaffik taanna nunaminertanut politikkitsinni aamma ersersinneqartariaqarpoq. Inuiaat nammineerlutik aalajangiisinnaatitaasut nunartik nioqqutissanngortittariaqanngilaat.

Pisortanut aningaasatigut allaffissornikkullu kingunerisassai

Inatsisissatut siunnersuummik tamatumalu kingunerisaanik allannguutini pisariaqartunik suliaqarnissamut AC-tut atorfillip ukiumut sulinerata nalinga ataaseq tikillugu pisariaqartinneqassasoq, tassa 500.000 kr.-it missaannik aningaasartuuteqartoqassasoq, missingerneqarpoq. Nunaminertanik atugassiisarnermi tunngavik atuutereersoq inatsisikkut aalajangersarneqassammat, pisortanut annertuumik ingerlaavartumik aningaasartuuteqarnerulernissaq imaluunniit isertitakinnerulernissaq naatsorsuutigineqanngilaq.

Namminersorlutik inuussutissarsiortunut aningaasatigut allaffissornikkullu kingunerisassai

Inuussutissarsiortut nunaminertamik atuisinnaatitaanissamut maanna periarfissaat allanngussanngilaq. Taamaallaat siunissami nunap namminersortumik pigineqarsinnaanera, qularnaveeqqusinneqarsinnaanera niuerutigineqarsinnaaneralu periarfissaajunnaartinneqassapput. Nuna ullumikkut aamma namminersortumik tunineqarsinnaanngimmat niuerneq pioreersoq allanngortinneqassanngilaq.

Innuttaasunut aningaasatigut allaffissornikkullu kingunerisassai

Innuttaasut nunaminertamik atuisinnaatitaanissamut periarfissaat allanngussanngilaq. Taamaattumik toqqaannartumik aningaasatigut sunniutaa killeqassaaq.

Pisortanut aningaasartuut uuttorneqarsinnaasoq maanna amerlanerpaamik inatsisiliornermut 500.000 kr.-it missaanniippoq. Tamatuma saniatigut inatsisitigut erseqqissarneqassaaq nuna nunaminertallu namminersortumik pigineqarsinnaanngitsut. Siunissami nunap namminersortumik pigineqarneratigut niuernermi nalinga taamaalilluni piviusunngortinneqarsinnaassanngilaq.